

L'herbâtatte, te coégnas ?

Ç'ât ène boénne aivéje, dains not' care de tiere, d'invitaie, tiaind ène lôvrèe tire en sai fin, ène rotte d'aimis en l'hôtâ po pare in d'rie voirre. Bîn s'vent, ène petète gotte, in tçhissat de gniôle fait l'aiffaire.

Dés côps, meinme aivô dés patoisaints, lés vartâbyes noms de cés dichillès d'moérant mâ coignus. Dali, i prens l'richque de péssaie po in véye raicodgeaire, èt i vôs invite è faire lo toué de totes cés gniôles po en raippelaie l'nom.

Ç'té que fait taint de bîn tiaind l'èchtomaic è di mâ de cheûdre, aipré in bon r'çegnon, ç'ât bîn chûr lai pamme. Chi èlle ât dichillèe aivô dés fruts savaidges, an l'aippeule beûtchîn. Meinme tchôse aivô lai poire, que prend l'nom de biasson tiaind èlle ât aivu faite aivô des p'têtes poires que v'niant d'aibres que n'sont'pe aivu entès. Entre lés dous, lo coing, qu'an aippeule achi « djâne èt dure ». Po lai prune, an dit putôt lai bloûeche o bîn lai quwètche. Cés prunes aint dés soeurâttès pus tieûlèes èt chutôt pus nobyes : l'herbâtatte â nom rempiachu de michtère èt de promâsse, èt lai damè, lai fiertè dés Barotchès. Tçhétçhe annèe, è s'y en déchent dés litres èt dés litres en lai Sînt-Maitchîn, sains comptaie totes lés botayes que raimoénant en l'hôtâ, lés dgens que sont v'ni fétaie lai Sînt-Maitchîn dains nôs v'laidges.

Dès côps, an bote simpymement l'mot « âve de... » devaint l'nom di frut qu'ât aivu dichillè. Ç'ât chutôt vrâ po l'âve de ç'lieje. È fât r'coégnâtre que ç'ât brâment pu bé que « kirsch ».

An fait achi d'lai gotte aivô totes soûetches de p'tèts fruts raimèssès tchu lés boûetchets. Lai noire épaine bèye lai p'nale èt lai biantche épaine, lai poiratte de djué. Aivô ène étchiele, an tçhieût lai beutnie o l'âlue. Redéchendus tchu tiere, vôs porèz rempiâtre vôs crattes d'ambres vou de moûres que bayrint dés gottes putôt bâmèes. Èt pe, aivô in cro èt brâment de coraidge, an peut encoé tirie d'âtres trésoûes de lai tiere de tchie nôs : lai djaintiainne, sains rébiaie lés pomates, meinme chi lo tchîn ât mitnaint malaîjie è dégotaie.

An n'sairait être compiet dains ç'te lichte, foûeche qu'è y é des soûetches de fruts. Chur que quéque véye tiurie d'Aîdjoûe, bîn coignu dés aimoireus de dichillè, nôs en airait propojè d'aivaintaidge.

Dali, cés qu'aint péssès yôs fédrâs condgies aivô dés Valaisains aint craibîn encoé, à fond di gairguesson, in seuv'ni de poire Williams o bîn d'obercotine...

L'micou